



KOLË JAKOVA

QIRIU I

FUNDIT

KOLË JAKOVA

# QIRIU I FUNDIT

~~33675~~

LIBRARIJA E SHTETIT  
QIRIU I FUNDIT

~~12759~~

12759

N.Sh. BOTIMEVE «NAIM FRASHËRI»

TIRANË, 1963

## QIRIU I FUNDIT

### 1.

Lugjeve të blera  
mbushun me zabele  
ku bilbili vendçe  
vetëm di t'ia thotë,  
ku mbi tuma t'moçme  
një bari gjithë zhele  
ia merr ambel fyellit  
delet tue kullotë,

sa ma larg shëshjollit  
rrug've gjarpënusha,  
që ia trazojnë gjumin  
heshtjes shekullore,  
atje ish Sanxhaku  
me krahë hapë nga fusha,  
ku zbardhonin kullat  
lule malësore.

Bjeshkë e male t'nalta  
rreth e rreth qëndronin  
si vigaj të mplakun,  
kokën bardh me thinja,

tue dremitë katundit  
heshtjen ia urdhnonin,  
që të qetë të rridhnin  
vitet varg me mija.

2.

Tek ato të lashta  
vorre t'Ilirisë,  
porsi vorre t'gjallësh  
kullat pa dritare  
ndrynin bashkë me kafshët  
edhe rob't e shpisë  
derë sa ikte nata e  
zezë e kobatare.

Njëmij bestytnina  
lidheshin vargue.  
Gjyshi ndejë te votra  
niste e tregonte  
si pat dalë kulçedra  
atje poshtë në prrue  
kur rrufe e qiellit  
mal e fushë tmeronte.

Gjyshja plakë tue tjerrun  
n'furken, që i la nana,  
boshtin e përdridhte  
shtangue sytë n'pishtar;  
ndillte shtojzovallet,  
thirrte orë e zana  
kullës s'moçme fatin,  
që t'ia sillnin mbarë.

## 3.

E kur frynte jugu,  
 nxinte porsi futa  
 qielli e retë mizore  
 pillnin veç rrufe,  
 edhe bish't e malit  
 fshiheshin ndër skuta,  
 bulurimë e motit  
 dridhte gur e dhe.

Çamarrok't e vegjël  
 përfrigue nga tmera  
 ngjeshë për parzme t'nanës  
 lypnin veç shpëtim,  
 kryqin bante plaka,  
 furken menjëhera  
 linte dhe fillonte  
 ritin me nderim.

Një dorë lar kërtulun  
 n'shorte dhe magjina  
 digjte gjyshja e koken  
 nalt nga qielli e çonte  
 e me tym kadiste  
 rob e kafshë e kthina,  
 shpirtënve të namun  
 hovin t'ua ndalonte.

## 4.

Strofujt atje kishin  
 dhe shkerbetë e malit

ujqit, që tërbohen  
kur uriya i ndjek.  
Atje bashkë me farën  
edhe djers'n e ballit  
mbillte bujk-qyqari  
jetës me i hapë shtek.

Kur ia behte zija  
n'gardh parmendën drunit  
hidhte bujku e armën  
mirë për dorë shterngue  
për të ngjallun t'mitujt  
që po i vdisnin unit  
prenë kudo kërkonte  
si ulkonjë tërbue.

Me qefin nën sjetull  
dy tri bagti t'ima  
sillte baba malit  
plot gëzim te shpija.  
Rreth e rreth ferlikut  
zhdukej si vetima  
mortja nga fytyrat,  
shuhej dhe uriya.

Me poninë e ritit  
ndahej preja e pjekun,  
me uratë përcjellun  
gjatë e pa mbarim.  
Plaka thirrte n'voter  
shpirtënat e vdekun,  
që nga ata kurhani  
t'mirrte një bekim.

Ora e Sanxhakut  
 ndejë kacuk mbi shpija  
 me jetue i urdhnonte  
 besimtar't e mirë  
 mbas zakonit t'vjetër,  
 që la lashtësija,  
 kur kurbane u thernin  
 zotavet ilirë,

Nëpër andrra t'gjallët  
 me të vdekun rrinin.  
 Çmallej nana e djegun  
 me të vramin djalë.  
 Çilimijtë prap babën  
 e dëshruem e shihnin  
 sy përdhe kah zbriste  
 malit dalngadalë.

T'nesërmen te votra,  
 andrrat si dëgjonte  
 plaka nder mendime;  
 n'lutje zhytej thellë,  
 si priftneshë ilire  
 gjatë profetizonte  
 t'mirat edhe kobet  
 moti, që do sjellë.

Vdekja prap e dashun  
 hiqej me të vdekun.  
 Posa binte nata  
 vorrit ata letë,  
 porsi zogj, që malli

për fole i ka djegun,  
dilnin e shetisnin  
kullat mbetun shkret.

6.

N'djepin e padijes  
fshati na u përkundte,  
n'gjumë ku thuren andrrat  
me dëshira plot.  
Gishtin vu te goja  
ora vetë e tundte  
ate djep, që shekujt  
nuk e trandën dot. ,

Tok me lashtësinë,  
tok dhe me mjerimin  
fshati t'gjallë e t'vdekun  
çante n'për errsi  
t'jetës primitive  
tue kërkue agimin,  
si kërkon verbani  
dritë për sytë e ti.



## PJESA E DYTË

### 1.

Mesi i natës. Kupës s'qiellit  
shejzat vezullojnë.

Shpat në shpat po përshëndesin  
gjelat shoqishojnë.

Flen Sanxhaku. Ambël terri  
n'parzme e ledhaton;  
qyrkun-futë ia hjedh përsipër  
e gjithka e mbulon.

Flen Sanxhaku si flen pylli  
fletët kur s'piptijnë,  
kur dhe çapin e mat bisha  
mos po prish qetsinë.

Por te kulla, ku stërgjyshat  
patën ndejë dikur,

nana-plakë porsi gur vorri  
votrës rri përurë;

votrës s'lashtë, që brez pas brezi  
zjarri i pat ndejë ndezë.

Aty gjyshja po i rri sogje  
natës pis të zezë.

Flokët bardh e sytë si shqipja,  
që nga shkambi kqyr,  
motet keq ia punuen n'lavër  
rrudhat në fytyrë,

Të dy duert drejtue nga zjarri,  
sytë mbërthye nder flakë,  
murmuron si magjistare  
kurrizdala plakë.  
Murmuron, por n'tjera kohna  
mendja i kullot,  
dhe pse dora njih rruzaren,  
goja s'di çfarë thotë.

2.

Një vit nuse pati gjyshja,  
qoftë-o për at'herë,  
kur me vig ia sollën burrin  
vdekun miqt në derë.  
Mbas tre muejsh na u lind jetimi,  
solli gaz e vajë.  
Vejnoi nana e n'kullë të burrit  
ndeje e nguli rranjë.  
Qysh at'herë amanet zotit  
n'lutje ia pat lanë  
guximtar t'ia rriste t'birin,  
që t'paguente t'anë.  
Si lastar u rrit jetimi,  
synin si fajkoj;  
trembdhjetë vjeç me pushik të tatës  
krahun zbukuroi.  
Dikur nana 'i çikë ia zuni,  
çikë si zana n' mal,  
fat i madh për ato kulla,  
fat edhe për djalë.  
Kaluen vitet, erdhi dita,  
vadja si pat qenë;  
mes oborrit zbriti nusja

kalit e u fut mbrendë.  
Grue-fisnikja malësore,  
sa kaloi një mot,  
djalë i fali kullës s'vjetër,  
mbushi djepin plot.  
Edhe trenët desh bleruen  
kaq gëzoi kjo shpi!  
Thue po shtohej porsi motit  
votra përsëri!

3.

Iku dimni erdh pranvera,  
djalë ma s'duroi,  
n'andërr baba randë i foli,  
gjakun ia kërkoi.  
Pritë më pritë ndër male e pyje  
mori për të letë.  
Fort po digjka e pezmatoka  
kjo hakmarrje e shkretë.  
Krisi pushka ndër livadhe,  
n'pritë një bari mbet.  
U muer gjaku e vorri i babës  
rahatinë e gjet.  
Por gëzimi, që sjell kobi,  
gjatë medet nuk mba.  
Sa ka grykën gojë-shëmtuemja,  
aq nafakën ka.  
Gjaku gjak, thonë pleq't e vjetër,  
lyp e nuk pushon.  
Duhma e tij të ndjek një shekull.  
votrën ta shkretnon.  
Mbi parmendë ra trimi i gjyshes  
krrusun trupin lak,

ndaluen qetë hakrrue nën lavër,  
vinte era gjak,  
Gjama e gjyshes dridhi kullat  
posa zuni fill.  
Mjeroi fusha, mjeroi male  
dhe u ngjit der në qiell.

4.

Shtyhet nata, kup'n e qiellit  
shejzat e kalojnë.  
N'për katund tashti dhe gjelat  
kangën e rrallojnë.  
Ndejë te votra rrjeshton gjyshja  
lutjet mbarë e mbarë:  
— T'bukrin Col, o Zot, jetimin,  
rrite sa ma parë.  
Atë jetim, që flen ndër petka  
me nanë-loken pranë,  
ballë-shpërvjelë, vetull-bashkue,  
gjyshit t'vet i ngjan.  
— Rueje, o Zot, si ruen ulkonja  
strofullin me klyshë.  
N'dorë gjaksorit ngrija pushkën  
e verboje syshë.  
Ngjitja krahun ndër rrëpina,  
kamba ku të shket,  
mproje ethesh, rueje dergjësh,  
rrite me shëndet.  
Nëpër logje shtojzovallesh  
mos të prekë pa dashtë,  
mproje shtrigash e rreziqesh  
kur ban hana jashtë.  
Rueje shitet, mproje plumbit,

rrite si zambak;  
Prija mbarë kur t'i vijë shtegu  
për të marrun gjak.  
Paqë t'u japë vorreve t'vjetra,  
Zot ti na ndihmo.  
Kam dy plagë në zemër time,  
mos të vdes me to.

5

Mbaruen lutjet. Ngrihet nana,  
zjarrin e mbulon  
e me masë një kryq përsipër  
hinit vizaton.  
Me pishë ndezë, si hije nate,  
nipit kaçurrel  
po i afrohet gjyshja e flokët  
lehtë ia përkëdhel.  
Syve u bjen: — «Gurit e murit!» —  
plaka murmuron.  
Mos pa dashë hijeshinë Colit  
syni ia shëmton.  
E puth ambël, si pat puthun  
atë të shuemin djalë.  
Nëpër rrudhat e fytyrës  
rrjedh një lot i valë.  
U fik pisha, kull'n e vjetër  
terri i pabesë  
e mbuloi e plaka ndore  
i ra natës s' zezë!

## PJESA E TRETË

### 1

Përmbi një tumë ilire  
jetimi zhele-zhele,  
pas shkollë, dy-tri dele  
i ruen ndër megje pranë.  
E fyellit malësorçe  
i bie kaproçi djalë,  
fërshtiza valë-valë  
luginën e përllan.

Një mall rrëfekan jonet,  
që fyellit fjollë i dalin  
e hikin, marrin malin  
si zogjët mërgimtarë.  
Ngjan mall i lamtumirës  
kur del me afsh nga shpirti;  
vallë zemrën ç'ia goditi,  
që i binka kaq me zjarr.

Ndër gishta ç'lëngon fyelli,  
çfarë e trazojti çunin,  
sa ta braktisë katundin  
ku lshoi të bukrin shtat!

Ndër kodra t' Kokërdhokut,  
një shok i thashka 'i hera  
se porsa t' vijë pranvera  
do mbushet breg e shpat

me t' rij edhe me t' reja.  
Se ç' punë do bëjnë s'e dijte.  
Do hapkan një rrugë drite,  
do ngrejne Hidrocentral.

Do ndrojnë dhe këtu jeta.  
Sa e bukur shoqënia  
do jetë, ku sot vetmija  
shpirtin ta bren ngadalë.

## 2

Ja, erdhi edhe pranvera!  
Si thneglat vlon rinija.  
Lanë prind e lanë shtëpia  
e behën n' Kokërdhok.  
Andej buçasin minat.  
Shungullon Denja e Murra.  
Ç'u ndeshkan shkamb e burra  
e po luftuekan tok!

Ushtima e punës Colit  
zemrën keq ia lëndueka.  
— Kështu ma s'u durueka  
të bredh si bari kot...  
Nesër do marr bekimin.  
Këtë jetë kaq të vetmueme  
si zhele të vjetrueme  
s'e qaska shpirti dot.

Pa le të flasë dhe gjyshja!  
Kurrë zemrën s'ia lëndova.  
Gjithnjë n'dëshirë i shkova,  
bari por s'bahem unë.  
Me shtriga e shtojzovalle  
e bestytina t' kota  
me shekuj larg nga bota,  
m'u vel dhe ky katund!

Përsëri fyellit ambël  
Coli ia nis. Tingllimi  
rrëfen se vuejtja e gzimi  
zemrën s'ia linkan qetë.  
E jonet derdhen fshatit.  
Dëgjon nanë-lokja t' birin.  
Ç'ia përkëdhel dëshirën  
një mall i largë, medet!

Një mall i bukur shqimit,  
kur ai fatziu ia thonte.  
Se ç'afsh at'herë gufonte  
n'për fyell plot me rrëmbim!  
Njëmi fershtizë e trille  
zemrën ia ledhatonin,  
kur dashuninë tregonin,  
që kish i mjeri trim.

Eh, pushkë, ti qofsh mallkue!  
Sa votra shqipëtare  
i shove, i qite fare  
për të shëmtuemin gjak.  
Sa gra, vejusha t'reja  
i thave si than vera  
barin ndër fusha t' blera  
e s' pate dhimbë aspak.



E lehtë lokja si era  
 kryen rrangët me krye ulë  
 e urtë, e urtë si pulë,  
 as gjurmë s' len kah kalon.  
 E knaqet vejnim-zeza  
 tue përgatitë ushqimin,  
 veç si ta rrisë jetimin,  
 që shtat përditë lëshon.

Në prak të derës gjyshja  
 furkën po e nduk e shtillet  
 peni për bosht, që sillet  
 e sillet fluturim.  
 Ashtu njëmi mendime  
 plakës në kokë i zijnë  
 e si çekan i bijnë,  
 e rrahin pa pushim!

— Ca shenja mbarë s' po duken!  
 Në fshat u prish qetsija!  
 N' Sanxhak po vijnë njerzija  
 e shkojnë e s'rrijnë rehat.  
 E çfarë buçet andejna  
 nga Ulza n' ato boka  
 aq randë sa trandet toka  
 e dridhet mbarë një fshat?

Kulçedra plot me rrota  
 ngul dhambët nëpër tokë.

3 3675

BIBLIOTEKA E SHTETIT  
GJIRKASIT

127/105

10751

Gjithë vendin e ban trokë.  
S'ka burrë, që i del përballë. —  
Maqinë ma t'egër syni  
s'i pa. — E ç'dreq e pruni  
të çmendet mbarë katundi  
tue e pa gjithë atë zgardallë?

Mandej edhe nipoçit  
sikur i qesh fytyra  
kah shef këto mënxyra  
e nuk i zihet vend.  
Mërzitshëm i merr delet.  
Veç n' libra e ka menden.  
As e shikon parmenden  
fyellit përballë i bjen.

Sa i qetë na ishte 'i hera  
ky plak i metë, Sanxhaku.  
Askurrë këtu të praku  
s' dëgjova zhurmë si sot.  
Ti mëshirë-madh, që s'naltit  
seicilit ia ndan fatin,  
sille ndër mend të ngratin  
njeri! Na ruej, o Zot! —

## PJESA E KATËRTI

Krapat e moçëm nëpër gjumë gërhasin  
e nata plot me hije vjen përmallë.  
Dremit katundi e veç ndoj qen i rrallë  
heshtjen mortore e then sa për zakon.

Bri votre Coli, n' dritën e bishtukut  
lexon: — N' Sanxhak krejt n' ujë do mbytet vendi  
dhe n' Ulzë e deri nalt, at'herë liqeni  
do ndrisë Shqipninë ku lind e perëndon. —

Kënaqet lokja ka' e dëgjon të birin,  
me sy dashnorë pada rrin e soditë.  
— Sa mirë mësoi jetimi e shpejt u rrit.  
Mallin e t' shuemit n' zemër ç'ma tërbon! —

Fytyra e saj ze çelet si pranvera.  
Shtizat pushojnë nëpër të shpejtit gishta.  
— Vërtetë, o bir, nëpër kasolle t' trishta  
drita do vij ku pisha ndrin n' shembtim?

A thue do ndodhë, që t' bukra shtigje t' hapen  
edhe për ty? Pa t' bahet çfarë të dojë.  
Ku ti t' jeshë mirë, aty nana do rrojë  
se jeta pa ty pranë s' më ka kuptim. —

Murmuron lokja. Prap shtizat lëvizin  
nëpër të bukrat shputa. Djali at'herë  
ma tej leximin nis e shend e verë  
ditët e largta i kujton me gzim.

Pranë votre plaka fshan: — Vullneti i zotit!  
Çfarë qenka kjo? O perëndi, na thuej,  
pse fshatin tonë ti don ta mbysish n'ujë?  
A thue me gur na qiellin ta sulmuem?

A s' ish Sanxhaku, që 'i mij lutje n' mbranje  
ty t'i drejtoi e me bark bosh ra e fjeti?  
A thue nuk hoq dhe aq katundi i shkreti.  
A por ndër vuetjtje t' randa na u dëshpruem? ⇒

Gjyshen vren Coli. Ndër të vrazhdat rrudha  
një lot' shetit me nge n' fytyrë të plakës,  
që n' voter ngulë shikimin ka e flakës  
ankimet zemer-plasun varg ia thotë.

— Ç'na duhet ne dritë tjetër kur vetë dielli  
na ndrin me urdhën tand edhe na nxenë.  
E kush veç diellit e përfshin gjithë dhenë  
e madhnisë sate i përgjan, o zot?

S' durohet, jo zhaurima n' fshat të vjetër.  
Na duem qetsi te votrat aty pranë zjarrit  
të rrijmë, edhe një kafshatë bukë përsmbarit  
ta hamë me lot e gaz, si sot si mot.

— O e mira gjyshe, — ambel e pyet nipi. —  
Pse ka sa kohë, që lngon kjo zemra jote?  
T' vjen keq për tymin, që na nxiu ndër mote?  
Trenët e sytë e jetën na e shemtoi.

U lodh së vuetjuni ndër shekuj fisi,  
verban n' për diell. Tashti na zbulojmë dritën.  
Nëpër oborre lule të na rriten  
e begati të derdhet n' mal e shtoj.

— Ç'asht ky, që flet? — N'për dhambë belbëzon  
plaka. —

S' asht ky filizi i fundit në brezni!  
Ky fisin tonë n'për shekuj s' do e përtrij!...  
Mo Zot, andrrat e mija t' marrin fund!

Po, ma gënjyen nipoçin, ma gënjyen!  
T' mallkuemit libra njëherë s' heq dore.  
Naj thotë t' braktisim tokat stërgjyshore  
e t' marrim rrugat pa gjetë cak askund.

Pse don t' na i mbysinh n' ujë, o zot, ti kullat,  
që gjak gjithnjë kulluen për mota t' tana.  
Këtu na e shkuem rininë e ndër kto ana  
pllambë e kujtim na mbollëm n'për katund.

Kemi muranat, kemi vorret tona.  
Atje ne dheu me ngrohtësi na shuen.  
Breznitë e fisit varg atje pushuen.  
Atje ma qetë na jemi se kurrkund.

— Pse t' mendojmë vorret, gjyshe, dhe muranat?  
T' mendojmë për jetën. Ja, po vjen agimi.  
Po shkundet leckash, gjumi dhe mjerimi  
Sanxhaku i shkretë e fatin sot po lyp.

— Ç' e duem atë fat, o bir, që na nxjerr kullash  
e votrave të lashta u prish çetsinë.  
Ma mirë n' vend tonë, ma mirë kështu n' errsinë,  
bukë e pa bukë, bylmet veç një dorë krypë.

— Jo, gjyshe, jo! Brezninë e fundit ndryshe  
jeta e gatoi. Na lumit ia ujdishim  
rrjedh'n e tërbueme e s' nalti e rrokullisim,  
në dritë e kthejmë, çfarë lutjet s'e bajnë dot.

— Fol, fol, o nip, o gjak — stërgjak i fisit!  
Vdekja pa ardhë, ti i pari ma tregove.  
Ti zemrën copë ma bane, ma shëmtove  
fundin e jetës me çfarë fole sot! —

— Aman, gjyshe m' kupto, lene vajtimin  
e mos m' shiko me sy, që janë aq t' huej.  
Jam bir i fisit, jam unë Coli i juej!  
Fati më suell derë te i mjerimit cak.

Mue po m' takon ta kapërcej hendekun  
që ndan brezninë nga e pa mshirshmja jetë!  
Ne jetës do t'i prijmë siç e dijmë vetë,  
pa le t' mbarojë dhe ky i shkretë Sanxhak! —

Përendoi sytë si magjistare plaka  
e zjarrit nuk ia ndau të lvyrtë shikimin.  
— Pse, Zot, kaq t'egër sot ma dhe ndeshkimin  
e djallit nipin tim ia hodhe n' lak? —

## PJESA E PESTË

### 1.

Te e lashta kullë e fisit  
jetës i ndrroi fytyra;  
humbi e murme ngjyra  
e ditve pa mbarim.  
Heshtija e randë mortore  
pa pritë një grusht e mori  
e votra me te e bori  
të vjetërin kuptim!

Ndaj plaka sot rrënkueka.  
Një lamsh mulla i vërtitet,  
e n' zemër gjithnjë i rritet  
e rritet për ibret.  
— Si mund t' braktiset vendi  
ku brez pas brezi jeta  
rrodhi ndër caqe t' veta  
e kurrë nuk u la shkret?

Iku dhe Coli, shpresa  
e ditve t' mija t' fundit.  
Mbi Ulzë me djern t' katundit  
shkambijt e malit çan.

La delet ndry nën øher,  
la votrën ku mësonte  
ligjët t'i trashëgonte,  
që gjysh-stërgjysh na lanë! —

2

Nanë-lokja ndoq të birin  
ashtu si syni dritën  
e n' furrë t' gëlqeres ditën  
e soska zemër-plot.  
Lodhë e këputë në mbramje  
në kullë derë mbas mesnatës  
punon, e 'i herë së ngratës  
goja ankim s'i thotë.

3

I trëndafiltë agimi  
po puth me gaz brigatën,  
që n' punë e kaloi natën  
ku shkambi vje' i vështirë.  
Sa bukur vesa i ndritka  
lules në gji t' petalit  
nga rrezja, që zbret malit  
si guri-xhevahir.

Edhe n' Sanxhak kish lule,  
dhe atje vinte pranvera,  
por Coli kurrnjëhera  
kaq ambël s'i kundroi.  
Kjo qenka pranverë tjetër,  
jetës ia hapka synin,  
ia davaritka tymin,  
që n' shekuj ndryshk lëshoi.



N' agim dhe kanga shpirtin  
sikur ta ambëlsueka  
kur brigjeve u lëshueka  
e lirë në fluturim.

U lodh tetë orë brigata.  
do flejë e do qetsohet,  
në shkollë posa të zgjohet  
do shkojë, mandej dëfrim.

E shpirti at'herë knellet  
si boçë e drandofillit  
kur gjithë ia shpërthen diellit  
e t' bukrën veshë zbulon.  
Papritë dhe zemra zgjohet.  
Si ndodh njeri s'e dijka.  
Tinës dashnija t' vijka  
atbotë kur s'e kujton.

4

Plaka një çikë pat zanun  
fisnike andej nga Xajsi,  
por nipi ia përplasi  
përdhe t'mbarën shkuesi.  
— Çikës, — tha — kur t' vijë fati  
zemrën po s'ia rrëmbeva,  
me pare kurrë s'e bleva!  
S'ka jetë pa dashuni.

Trullue shtang plaka mbeti.  
Iu duk se trent e kullës  
u shembën e i ranë tullës  
këtë gjuhë kur e dëgjo.  
— Po sikur nipi t' sillte  
një bushter të pa emën,

që shenjat ka si femën,  
por fis nuk ka as soj?  
E gjaku si do merret  
kur krah për krah gjaksori  
- me te punon mizori  
thue 'i nanë i nxuer në jetë.  
E bashkë bile po ndakan  
dhe bukën ndër tryeza.  
E çfarë s' dëgjoka e zeza  
qyçe, që e vetme mbet?

S' duron kanuni i vjeter,  
që djemt në gjak ndër veti  
t' rrijnë bashkë e muhabeti  
t'u shkojë ambël e butë.  
T' venë gojë bile mbi t' parët,  
që sa e sa herë kot derdhën  
gjakun e vdekje mbollën  
për një zakon bihud!

E vorret çfarë qetije  
do kenë gjakhupë po mbetën.  
Do vlojnë mbrenda gjithë jetën  
si grenza ngucë në shpat.  
I randë do t'u jetë gjumi,  
i randë guri te koka,  
nuk do i durojë as toka.  
Do dalin jashtë lugat.

Mjerim për t' lashtët mote!  
Jetës iu thye kurrizi  
atë ditë, që s' pari nisi  
kjo zhurmë nëpër katund.  
O Zot, tash hapma varrin  
e zemrën e shkretnueme

shqyejma si leckë t' vjetrueme!  
Gropose e jepi fund!

5

Grykës tërthuer kjo diga  
sa thellë rranjtë i lëshueka,  
për shkrep i sigurveka,  
që bregut t' marrë hov lart.  
Si miza tue bubrrue  
puntorët qark lëvizin,  
sikur nuk po çalltisin  
e puna s'u ka grat.

Por për një ditë kalaja  
nuk ngrihet. Ajo rritet  
e rritet bashkë me vitet  
porsi një shkamb vigan.  
Shikon Coli prej s' nalti.  
— Ç' humnerë themel ka diga!  
Shikon e të ze friga.  
Njeriu u ba titan!

6

Ikën e ikën stinët,  
e ndoqën njena tjetrën;  
e shtyni e reja t'vjetrën,  
vjeshta la veren pas.  
S' bashku me digë u rritën  
të rinjtë, që valë mbas vale  
luftuen me këto male  
e djersën dhanë me gaz.

N' pranverë vjollca u prini  
luleve nga kaçuba,  
e varg tjerat me tuba  
hieshuen e gur e shteg.  
Vjeshta një lule mali  
na paska mjaft krenare,  
që s' do t'ia dijka fare.  
As brymë as ngricë s'e djek.

Na qenka vashë Barbullë,  
kjo lule malësore,  
e bardhë si dalë prej bore,  
e lehtë thue fluturon.  
Kah shkon e vjen nga puna  
kurrkujt sytë s'ia lëshonka,  
«Më duej» zemrave u thonka.  
«Më duej ti, që m'shikon».

Ate një dite Coli  
mes shoqesh n' rrugë e ndali,  
e bashkë me lule i fali  
dhe një unazë për shenj.  
Ç'u prek krenarja e Matit.  
U skuq e desh t'u mpronte.  
Kur pau kush ia dhuronte  
krye-ulë besës i ndej.

Rrugës po kthen brigata.  
Ç'mëngjese ka pranvera!  
Pranverë dashka përhera  
ky i bukri shpirt rinor.  
Mes shokve nëpër krepa  
si pushka zani krisi

e kanga udhën nisi  
n'për flladin pranveror.

7.

Dëgjton lokja, te praku  
vrik del e zemra i knellet.  
sa kandshëm, sa këthjellët,  
mbi tjerë Coli këndon!  
Kundruell duel dhe Barbulla.  
la shoqet në fjetore,  
drenusha malësore  
ndjeu drenin, që e kërkon!

E lokja sytë ia ngjiti.  
— O Zot ç'nafakë e madhe!  
Nga vinke, ti sorkadhe.  
Çfarë malesh t'rritën ty!  
Me zemër n'valë dashnije  
ngadalë zen e i afrohet;  
e vajza po turpnohet  
përdhe t'hutuemit sy.

I heshtun përçafimi  
ma tepër paska hijë.  
— E lumja unë, o bijë,  
që t'mora n'parzëm tim!  
Ti e jetës sonë je pema,  
je syni, je shkëlqimi,  
ti i ditve t'mija gzimi  
dhe i lashti trashëgim!

Nanën jetimja e gjeti  
 tek zemra e ngrohtë amnore.  
 Dashni e nan's arbnore  
 fillon, por nuk ka fund.  
 Në punë u mbrujka fati  
 ndryshe nga ç'dikton fisi,  
 pa le t'vorfnohet lisi  
 degash e t'mbesi trung.

Trung gjyshja ndej te votra  
 me fe, ligjë dhe zakone,  
 uratë, supërsticjone  
 mbështjell, përziën, rrekllen.  
 Para ma jet's shikimin  
 s'ia lshon. Ndër shekuj t'zhytet  
 e n'myk të tyne t'mbytet  
 atje plak's i pëlqen!

## PJESA E GJASHTË

### 1.

Me dorë pret diellin gjyshja, shikimin  
n'katund larg e mërgon.  
Me terr po i vishen sytë e nga gjoksi  
me i dalun zemra i don.  
— Stërnipat nisën me dorë të tynë  
t'rrenojnë çfarë s'patën ndreqë.  
Rrëxojnë gërshanza, hatulla, trena,  
o Zot, ti mos ma keq!  
Si u ban zemra burrave t'fshatit,  
granija si durojnë!  
Për mue ma i ambël njëqind herë vorri  
se sytë çfarë më shikojnë!  
O trenë të shkreta, njëqind vjet tymi  
përnatë u pat përkdhelë!  
Ju dogj anmiku, por kulla e moçme  
kurrë vorr si sot s'pat ngelë!  
Mosni, bre burra, për hatër t'Zotit,  
ç'ju ban çati' e shkretë!  
Pa kullë, pa votër n'Sanxhak të fisit  
s'e due fare këtë jetë! —  
Për derë mbështetun shfren plaka e lotët  
n'për rrudha i vejnë rrëkajë!  
Coptohen trenët nga kalbësina,  
coptohet zemra e saj!

## 2.

Me sy përlotun kokë-ulë rrijnë njerzit,  
e randë asht ndamja sot!  
Djepi, që t'rriti, votra, rinija  
s'harrohen jetë e mot.  
Errun fytyrë krenar nipoçi  
dhimbjen e mund me zor.  
Tek po këputet filli i një jete  
zemra shpërthen n'krahnor.  
Sado të bukra t'jenë shtigjet para  
për kullë shpirti të djeg,  
për megje t'buta, kroje, kullota,  
për gur edhe për shteg.  
Por e mund dhimbjen tek ne krenija  
si e mund mali stuhinë.  
Krenar dhe Coli për herë të mbrame  
shikon pa da shtëpinë.

## 3.

Lokja gojë-ambël, simbas zakonit  
miqve raki u çon.  
— Për hajr qoftë dita, jeta përsmbari  
tek ne tashti fillon!  
Udha e mbarë kullës e gjakut t'vjetër,  
mjaft gjak u derdh përdhe.  
Të ndrrojë njëhera kjo jetë mizore,  
të rrojmë si njerz dhe ne.  
Vejnova, vllazën, që ta rris djalin,  
jo t'vrasë e t'vritet vetë,  
por ta shtojë fisin, ta shtegtojë jetën  
i ri dhe plak i mbetë. —  
E larg shikimi flutrim i turret  
tek lisi përmbi prrue.  
Baresha e vogël fatzinë ma s'pari



atje e pat takue.  
 Atje përkdheljet provoi e n'zemër  
 iu ngul për jetë e mot.  
 — E randë asht ndamja, o miqt e gjaku  
 aqë lehtë nuk falet dot!  
 Por t'na rrojë djali, pa e mposhtim zemrën  
 dhe t'egërin zakon,  
 se rrugë ma t'bukur kurrë hapë nuk patëm  
 për bijt e fisit tonë!  
 Lart kokën, burra, zemrat shtërngoni,  
 ma e lashta kullë ju pret.  
 Luejani kockat, ngrijani pluhurin,  
 si shoqet t'mbetet shkret! —

4.

— Gjyshe, — thret Coli, — eja përjashta  
 veç ti ke ngelë pa dalë!  
 — Po del dhe nana, o bijt e fshatit,  
 po del, mos daltë e gjallë!  
 Amani burra, prisnje plakë-mjerën  
 sa kullen ta vajtoj,  
 ku rrita djalin, që m'përvloi shpirtin  
 e zemrën ma coptoi.  
 O kullë e t'parve, motër fisnike,  
 sa t'deshi nana ty.  
 Sa 'u desh ju trena, që brez mbas brezi  
 çati na ndejtë mbi krye.  
 Ju kthina t'lashta, ku burri vdekun  
 u shtri si lis me degë.  
 Ju i numruet lotët, fshamjet e mija,  
 ju e dini çka kam hjekë.  
 Ju mure t'zymta, që m'i përgjani

ktij fatit tim të zi,  
 një copë nga zemra ia çkula gjoksit,  
 përjetë me ju të rrij.  
 Lamtumirë, votër, shoqja ma e dashun,  
 sa vjet të ndeja pranë!  
 Me lot mallngjimi për bir shëmtuemin  
 të lau e ngrata nanë!  
 Oxhak i vjetër, po të puth plaka,  
 plakoç e burrë bujar  
 sa mirë e prite mikun te votra  
 n'zakonin tand shqiptar  
 Vjehërr-fisnikut ti m'i përgjanje,  
 bashkë rrijshit pranë si shokë.  
 Ai vdiq, ti mbete, e sot gjithë fshati  
 kullat po t'i bajnë trokë.  
 O prak i derës, burrin dhe djalin  
 ti i prite shtri në trinë,  
 mandej i nise veshun si krushqit  
 nga shkojnë e ma nuk vijnë.  
 Këtu e mjera unë, nuse s'pari  
 kambën e pata vu.  
 E sot po iki jo n'krah të shokve  
 si qe gjithnjë kanu.  
 Po t'braktis nana pa u nda zjarrit,  
 pa u nda me gja dhe mallë.  
 O derë konakut, o derë e shpirtit,  
 mos dalsha teje e gjallë!

5.

Shtegut t'vjetër ec karvani,  
 sytë pa da ia lsho  
 fshatit t'moçëm, ku gërmadhat  
 ujt zen e i mbulon.

Fate t'ndryshme për Sanxhakun

na u caktuekan sot!

Njertzit ikin, fshati mbytet

n'ujë për jetë e mct.

Varg e varg si zogjt e vjeshtës

morën për mbatanë.

Veç rrenimesh e trishtimit

tjetër n'fshat nuk lanë.

Vetëm gjyshja s'don t'largohet,

keq një mall e djek;

ditë për ditë tue shikue fshatin

ndejë atje mbi breg.

Zhyten shpijat e rrenueme,

zhyten pa ia da,

Kullë e fisit përmbi tjera

dallon si kala.

Një nga një nën ujë po zhduken

muret me oxhakë;

e me to ngadalë përmbytet

zemra e nanës plakë.

Atje nalt ia hipi uji

mureve kulmorë;

si hajdut liqeni sulet

vorret t'i shtijë n'dorë.

— Ndali, kulla, ku po shkoni,

syni s'ju shikon.

Pa ju, o vorre, me të gjallët

plaka kot numron! —

6.

Ze vend karvani, për buhet fisi

në prehën t'Laçit plak.

Grumbull si lulet në tubë po i pritkan

shtëpitë e t'riut Sanxhak.

Me bujë mëngjesi sytë po na i çelka,  
sa zhurmë nëpër katund!  
Blegron bagtija, mahiten njerzit  
e puna vlon gjithkund.  
Fëmijtë po turren vrap e te sheshi  
e lojnat i fillojnë.  
Mbas topit sulen hakrrue si kecat  
kah ndjekin shoqishojnë.  
Pleqt ndejë nën hije n'kamish po thithin  
e flladi i ledhaton.  
Fusha e pamatun, natyrë e huej  
për shtat gjithnjë s'u shkon.  
Rinohet fshati, rinohet fisi,  
përtrihet mot për mot.  
Një rrobe tjetër veshi Sanxhaku  
sa pleqt s'po e njohin dot.

7.

Në Tiranë Coli shkollë na mësueka,  
u nis, muer tjetër udhë,  
N'Sanxhak i mbyti të lashtat ligje  
s'bashku me vorre e kullë.  
Ai u lind ndryshe, i bardhë si fati  
që u thur për Shqipëni.  
Mëson ndër libra si na u ndërtuekan  
hidrocentrale t'rij.  
Si rrjedhës s'lumit, që shkretnon fushat  
njeriu na i thashka: ndal!  
E drita veshka me rroba t'hieshme  
e shpirt e fushë e mal.

## PJESA E SHTATË

### 1.

— E kujt, o bijë, na qenke!  
Nga erdhe, nga u shkëpute  
e n'shtëpi tonë u fute  
pa t'pasun gjak as soj?  
E çfarë zakoni paske  
të vish si zog i true  
nën strehë të huej, a thue  
se votra ty t'kërkoi?

A por fytyr'n ia more  
ti fisit tand e ike  
prej turpi dhe prej frike  
të egërit kanu?  
Ngre kokën t'shikon plaka.  
O zanë, o shtojzovalle!  
Se ç'dritë, o nafakë madhe,  
lëshokan sytë e tu!

— O nanë, — përgjigjet reja. —  
Yt nip këtu ta solli  
ashtu si sjell kaprolli  
drenushen n'strofull t'vet.  
E zu ndër pyje t'Matit  
e vrik dorën ia ngjiti;

zembrën keq ia goditi  
e vajza n'besë i mbet.

— M'i lumtë! Ka gjak të parësh!  
N'kullë tonë gratë erdhën natën.  
Dhe mue grabitë më patën  
si grue me vlera shum.  
Eja të puth, lum bija!  
Krenou për burrë, që t'mori;  
krenou se e zanë me zori  
e parë do t'jeshë n'katund!

— Jo, nanë, me zor s'më zuni.  
Na bashkoi dashuni.  
Tek ai shpresat e mija  
i vara jetë e mot!  
Lashë prindët, lashë unazën,  
se fat ma t'mirë unë gjeta.  
Kështu pra e solli jeta  
në shtëpi tuej t'vi sot.

— Po e kujt na qënke, o nuse?  
— Jam bijë e atij gjaksori,  
që gjakun kur e mori  
vrau bab'n e fatit tim.  
Thau zembrën e nanë-lokes  
e ty një thikë ta nguli,  
që vorri s'do ta zhguli.  
S'qe gjak, por qe shëmtim!

— O zot! — me kujë thret plaka! —  
M'u largo syve t'vjetër,  
e n'pleqëni kulçedër,  
ti mos më ban, o djallë.

Mallkim kur kambën vune  
në këtë shtëpi të namun,  
Jo kurrë e nëpërkambun  
s'do rroj sa të jem gjallë!

Po ti. e re fisnike  
si ma duron mallkimin?  
Shpejt e harrove trimin,  
që gjakun ia shkel sot?  
— Jam nanë, o nana ime!  
E mund zemra zakonin.  
Kështu të par't t'vepronin,  
votrën do e kishin plot.

S'ia prish dot nana djalit.  
Mjaft gjak na derdhi fisi.  
Përsmbari jeta t'nisi  
pa prita e pa rrezik.  
— Mallkim, mallkim nga varret!  
Plagët kurrë nuk do thahen.  
Të vdekunit s'na ndahen,  
se gjaksin e bamë mik.

E shejtë urrejtja e fisit  
gjithmonë që nder kto ana.  
Nama, që lëshoi nana  
n'ballë gjaksin e qëlloi.  
E sot krushqi t'shëmtueme  
na bajnë. Mallkue shkaktari,  
se gjakun, që i la i pari,  
dhunueshëm e shkelmoi.

— Ndër gjuj të lutem, gjyshe,  
mos më braktis të mjerën.

Unë kurrë s'ta thava derën,  
pra lotët s' t'i duroj.  
Unë vi si rob shtëpije,  
me zemër n'dorë si motit.  
Me shpresë në krye t' motmotit  
votrën me djalë ta gzoj.

— U shoftë dhe pjella e jote  
e zanun me mallkime,  
Kudo bie nama ime,  
Atje s'del fije bar.  
Gjarprij nuk due për nipa,  
as bushtra, as harpija.  
Gjak lyp tek ju shtëpija  
e jo t'ma sjellish mbarë.

— Të due, gjyshe, si Coli.  
Shtëpi e fis braktisa.  
Këtu ku sot konisa  
do ngul rranjë jetë e mot.  
Më shiten mue me pare,  
por zemra kurrë nuk shitet.  
Fatit kollaj s'i shkitet  
kur Coli t'del për zot .

T'i thyejmë na duert vrastare;  
Kështu na mësoi shkolla.  
Shtëpi edhe kasolla  
mos t'lahen ma me gjak.  
Në punë na u mbrujt ne fati,  
te ato themele t'reja.  
Tashti, që u ngrit foleja  
pranom, gjyshe në prak!



Ikën çift porsi pëllumbat,  
 festë në Kokerdhok,  
 Ja dhe i ambli vend ku zemrat  
 u plagosën tok.  
 Shokë e shoqe përqafohen.  
 Vitet shkuen, medet!  
 Por s'u çkulkan dot kujtimet,  
 Ktu do rrijnë përjetë!  
 Fushë e male i mbuloi shëndi,  
 kudo kangë e gaz.  
 U dha urdhni, mrekullija  
 vrik u ba në ças.  
 Me zhaurimë si gjamë tërmeti  
 qafen ujt e theu.  
 Tue u vërtitë turbina e madhe  
 forcën n'dritë e ktheu.  
 Ndrin Shqipnija me 'i mij xixa  
 si margaritar.  
 Qiellit yjet ia grabiti  
 truelli shqipëtar.

## PJESA E TETË

### 1.

Puthi plaka kryqin  
ngjitun për rruzare,  
mandej mbarë e mbarë  
shejtnit i kujtoi.  
E nder shtroje t'buta  
lodhë e kputë e mjera  
ra dhe me një hera  
gjumi e kapulloi.

Plagë e pezmatueme,  
që s'shërohet kurrë,  
edhe n'gjumë si furrë  
digjka, o medet!  
T'vjetërat dëshira  
ja ku po zbulohen,  
nanës po i kujtohen  
vendet mbetun shkret!

Ja Sanxhak i fisit!  
Bash sikur na ishte  
kur të bardha i kishte  
kullat vend për vend.  
Ja dhe logu i fshatit,  
vorret tej mbatanë,  
ku kob-zeza nanë  
zemrën ndryni mbrendë.

Befas si vetima  
para doli djali,  
porsi sokol mali;  
zemra plak's iu drodh.  
Ma nuk priti e mjera.  
N'gjoks të përvëluem  
mori bir'n e shuem,  
ambël e mbështoll.

Ja dhe baba i djalit  
porsi burrat motit,  
synin flakë barotit,  
vetullat përpjek.  
Për në krah gjarpnushen  
n'pika serm qëndisun,  
në gjerdan ujdusun  
testet me fishekë.

Shumë i vramë fytyre!  
— Vallë, mos t'jetë zemrue,  
që kaq egërsue  
sytë po na i lëshon?  
Lutje ndoshta t'paka  
për te n'qiell dërgova,  
fare, thue e harrova,  
prandaj më qorton?

Nga ti po na vike,  
trim, o zemër-plasun,  
ç'idhnim paske pasun,  
që kështu t'rrëmbej?  
Burrin pyeti plaka.-  
Po t' shkretnuemin djalë  
si ma ktheve dalë  
nga njeri ma s'kthej?

- Andej vijnë, — tha trimi, -  
Mezi doren ngrejti,  
voret i rrëfejti  
e nuk foli ma.  
-Nanë, na mori malli,-  
gjegji djali at' hera,-  
n' vorr të rrish përhera  
ke mërzi sa s'ka.

Mandej e harrove  
fare këtë anë boke.  
Bashkë me miq e shokë  
vendin e le shkret.  
S'na kujtove vorrin,  
n' te qiri nuk ndeze,  
Kjo errsinë e zezë  
na mundon kjahmet!

T'shumash neve pritëm,  
si pret qorri dritën,  
por mbi vorr s'na ndritën  
qiri vjet me radhë.  
Amanet, o nanë,  
t' shumat ja po vijnë.  
mos na len n'errsinë.  
Dil t' na largosh mallë!

Kështu foli djali,  
e mandej mirfilli,  
si vesë para dielli  
babë e bir u shuen.  
Humbën si mos t' ishin!  
U zhdruk fshati i vjetër.  
Nanës me 'i plagë tjetër  
zemrën ia shporuen!

## 2.

Iku plaka si ato hijet,  
 që pa gjurmë kalojnë.  
 Njëmij duer e shtyjnë përmbropa,  
 rrokupujë e çojnë.  
 S'ndej ta presë stërnip-voglushin,  
 mysafir'n e ri,  
 që po vjen trashigimtari  
 fisin t'vet t'i prijë.  
 Amaneti i djalë-shuemit  
 forcë rinije i ep.  
 S'e pengon as shtëgu i dhive,  
 s'e ndal gur as krep.  
 — Mbase i mirë stërnipi rritet,  
 por u lind angllish!  
 S'erdh t'i ndreqë t'moçmet zakone,  
 erdhi që t'i prishë.  
 U zu n'gjak e shkelm i vuni  
 t'vjetërit kanu.  
 Gjaku ynë asht vogëlushi,  
 por medet s'e due! —  
 Murmuron e zemra i digjet,  
 forcë por shpirtënt kanë.  
 Mal në mal kudo e përcjellin  
 zemër tue i dhanë.  
 — Hiqni nipit, sakrilegjit,  
 vorret t'presin sot.  
 Shpirti yt n'zakone t'reja  
 nuk përpuqet dot!

## 3.

Lëshoi zanë foshnja, dhe lokja  
 shendit fluturoi.

Erdh voglushi, trim-kreshniku,  
shpinë e zbukuroi.  
Erdh sokoli, shamatari,  
rapashyt si dash.  
Erdh krenar, që t'i bjerë s'ardhmes  
serbes pash më pash.  
Si rebel kunorë nuk pati,  
n'kishë s'u ndez qiri.  
S'ndej ta presë plaka e muer malet  
përfrigue prej tij,  
Kaq i vogël e nxuer shpije  
si muranë të lashtë.  
Ra n'pambuk e prap ankohet.  
T'par't pra i ranë në kashtë.  
— Mos bërtit, — thotë lokja ambël. —  
Pra s'të pritëm keq.  
Për ma mirë, rritu t'pastë nana,  
pa të gjitha i ndreq.  
Shtëpi ke, dritë edhe shtroje,  
babën ingjinjer;  
Dashuni e shujtë e t'mira,  
e pse qan at'herë?  
S'të pëlqen ndoshta katundi,  
dashke ti qytet?  
Rrugën bukur ta shtruem para,  
nisu pra ti vetë.  
Mos ankohesh se stërgjyshat  
pak për ty punuen?  
Ashtu qe, bir, shteg i yni  
n'motet që kaluen.  
Por fatbardhë erdhe te dera,  
pra ankohesh kot.  
Lumi ti, që breng't e vjetra  
s'do t'i njohish dot.

Mos ankohesh ti për plakën,  
që pranë teje s'a!  
Të vijë keq, voglush, por jeta  
mbrapa shumë e la!

4.

Tinës miqve, tinës botës  
hana sa pa dalë,  
n'liqen plaka lundrën shtyni  
e me rrem ngadalë  
zu t'vozitë... Nga gjoksi zemra  
po i flutron në ças.  
— Ja dhe pak te terri i dendun  
djali m'pret me gaz.  
Ja këtu do t'jetë Sanxhaku,  
kodrat ma tregojnë.  
Pak ma andej atje te vorret  
babë e bir më ftojnë.  
Erdhi nana, bir i dashun,  
sonte t'rrijë me ju.  
T'shumat janë, qirinë jua solla  
siç ma pat't kërkue! —  
Bani kryq e si shortare  
n'dy gjujt plaka ra.  
Mbi liqen qiriu i fundit  
dritë po ban pa da....  
Ndrisin larg me mija drita  
atje larg mbi digë.  
Fryn zefiri nga Shkopeti,  
por qirinë s'e fik.  
Mekun fare pa dhanë shpirtin  
dritë ban me përtim,  
dritë, që shekujt bashkë me tymin  
na e lanë trashëgim.

## FJALE TË RRALLA NË POEME

**Sheshjoll** — rrugë kryesore. **Kobatare** — që sjell kob, fat-keqsi. **Fjollë** — në vij të drejtë, shpejt. **Me kaditë** — me tymosë për me largue shpirtent e këqi. **Shkërbé** — bishë, egërsinë. **Të mitujt** — të miturit. **Fërlik** — berr i pjekun në hell. **Ponj** — nderim fetar. **Kacuk** — galiç. **Verban** — i verbët. **Përrurë** — afër. **Sogje** — roje. **Rruzare** — tespijet e lutjeve. **Me vejnue** — me ndejë e vejë. **Vadja** — oroku, koha e caktueme. **Desh** — po thuej, gati. **Shejzat** — një tubë hyj, që vezullojnë së bashku. **Shitë** — Ndëshkim i zana-ve kur njeriu u prish pa dashë vallen, ose tryezën. Këtu smundje, e metë trupore. **Tumë** — vorr ilir. **Megje** — copa kullotash në shpat. **Kaprruç** — djalë i rritun, i shëndoshë. **Fërshtizë** — grumbull tingujsh trillo. **Jone** — tinguj **Me behë** — me ia arritë, me ardhë. **Shqimit** — plotësisht, unji. **Rrangët** — punët, që ka shtëpija. **Shputa** — çorapë lesh; të shkurtë. **Zhaurima** — Zhurma, që lëshojnë rrapat kur i merr era e fortë. Këtu zhurmë e madhe. **Shtoj** — fushë. **Muranë** — grumbull gurësh për të tregue vendin ku asht vra një njeri. **Me Ivyrë sytë** — me pulitë sytë. **E bori** — e humbi, e buer. **Me u knellë** — me u ngjallë, me shpërthyer, me u rritë. **Tulla** — pjesa e sipërme e kokës. **Bihud** — i kotë, budalla. **Me çalltisë** — me veprue shpejt. **Hatulla** — pullazina, drrasa, që mbulojnë çatinë. **Me u mahitë** — me u tallë, me luejt, me ba shaka. **Kamish** — llullë e gjatë. **Zog i truem** — zog ose pulë, që largohet nga shtëpija e vet dhe shkon e bahet si e shtëpisë tjetërkund. **Harpija** — qenje fantastike, grue me pupla e kambë si të shpendit. **Me konisë** — me kalue natën, me bujtë. **Të shumat** — dita e të vdekunve. **Rrokopujë** — zvar, me zor. **Angllisht** — gabim. **Sakrilegj** — mëkat i madh fort. **Rrapashyt** — si rrep pa bisht, shyt, rrumbullak.



*Disa vjersha*

## PARTI KRENARE.

Krenare,  
si malet tona shqipëtare,  
t'vështira shtigje tek kalonje  
të pashë, Parti;  
kur shkruam e hi  
qeni nazist me unën ndezë në dorë,  
tokën arbnore  
e digjte, gra e fëmij,  
një popull mbarë  
përpiqej veç ta qiste fare.

Krenare,  
të pashë saherë tek i kundroje  
bijt tu para plotonit,  
para litarit,  
e zemrën tande at'herë ti ua dhuroje,  
që gjaku i luftëtarit  
të rridhte zjarr i kuq,  
e ai zjarr t'ia digjte të dy sytë tradhtarit.  
Shqiponjë e maleve arbnore  
rrufe-granatat hidhje ti me dorë  
përmbi zaptues e tradhëtorë.  
Përherë me krenari

përpara anmikut veç qëndrove ti,  
shqiponjë Parti!

Por t'urtë edhe t' përvuejtun në fitore,  
kur t' brohorisin,  
kur tuba lulesh dhe kunorë  
ballin e duert tua i stolisnin.  
Kështu kalove ti, njerzisht, o nanë Parti!  
Lavdija jo; rreziku ty kreninë gjithnjë ta shtoi  
Sot kur t'kujtoj,  
prap m' duket se t' shikoj  
mes sheshit tek kaloje fitimtare.  
Për lule, jo; për to s'mendoje fare  
por t'ardhmen fytyrë-mvrejtnun po i hartoje  
tokës shqiptare.

Mbas çdo beteje, viteve me radhë  
fitoret urtësinë  
në gjak ta shtinë.  
Me ty në ballë  
n'gjergjef mirë e ujdisi  
këtë vend pop'li shqiptar,  
e njëmij lule t'bukra n' të qëndisi.

Krenare prap nalt ballin ngrij,  
ti sokoleshë Parti,  
Shtigje të reja,  
furtuna t' reja  
do kapërcesh gjithnji,  
se veç fitore  
e tjetërgja nuk njef e jotja histori.

Njëzetvjeçare sot ti përpin malet.  
Kurrë hovi yt ma s' ndalet.

Krenare prap qëndro si at'hera kur  
betejë n'betejë  
n'gjak lanje mal e gur  
der që lirisë ia ngrite të shtrejtin flamurë!

Ushtarë na ke, Parti, dhe pas  
të vemi ku ti urdhnon.  
E jetën plot me gaz  
e japim siç e dhamë gjithmonë.  
Krenare, pra marsho, se komunizmi  
ne na përtrin,  
e rrugën rreze-ar si diell na ndrin  
i bukri diell,  
i pastri diell,  
e shpëtimtar marksizëm-leninizmi.

## A M A N E T.

Madhështor mbi shesh të Krujës  
prisi div-kreshnik,  
vu si motit përkrenarën  
krejt mbërthye çelik;  
shtërngue frejt dori-idhnakut  
çfarë na shikon, vallë?  
pse qëndroi përmaje kalit  
nalt mbi pjedestal?

Mos dallon n'drejtim t'Tomorrit,  
o n'për Valikardhë  
tym e zjarr, që urdi-zezat  
rrugës lanë tue ardhë?  
Pse n'për shekuj turrin mori,  
gjumin ç'ia trazoi,  
e këtu te kullë e moçme  
vrapin e ndaloi?

— Fol, kreshnik se na zu malli  
prap t'a dëgjojmë zanë  
na stërnipat, që n'beteja  
ty të patëm pranë.  
Po dhe urdhën prap jem gati  
flamujt t'i shpalojmë.

Zhgjeto para, pas të ndjekim  
Arbëninë t'a mprojmë.

Div-kreshniku sytë i zbuti,  
nisi mengadalë,  
shqip si motit kur ushtonte  
bumbulluesja fjalë.  
n'gojë t' fatosit, sa dhe malet  
mbushun krenari  
e përsrisnin madhështore  
fjalën shqip të tij.

— Puna e mbarë, stërnipa t'fisit,  
gjithve puna e mbarë!  
Kështu desha t'iu shikonja.  
popull shqipëtar!  
Më zu mallë t'iu shof njëhera,  
o brezni e vonë,  
Që n'log burrash e përsritët  
prap ju lavdinë tonë.

Për gjatë shekujsh ndër beteja  
jetën dhashë si burrë,  
n'zemër tuej, rini përtrihem,  
mort pra s'pata kurrë.  
Ndaj iu due, stërnipa t'fisit,  
që ia dhatë stolinë  
dhe e nderoni si i ka hije  
bujareshtë Arbninë!

Nga ky shesh ku lirinë solla  
amanet ua la  
ruejeni këtë vënd shqiponjash,  
që me gjak u la.

Ruajini fitoret tueja,  
rrini në përgjim  
se me ju roje do mbetet  
dhe ky shpirti im.

Unë s'kam vdekë, vorr mos kërkoni,  
malli m'i ka shkri  
t'lashtët kocka; hi e pluhun  
me dhe janë përzi.  
Janë ba gjeth e bar e lule,  
një kunorë dafinë  
për sy-shqipën, nanë sokolash,  
nanën tonë, Shqipninë. —

Kështu flet kreshniku i fisit,  
malet nalt ushtojnë.  
Njani tjetrit zanë e tija  
si jehonë ia çojnë.  
Mandej divi nis e shtanget,  
detin tej kundron;  
e amshuemja sogje e Arbnit  
n'pjedestal qëndron.

## VALLTARJA E JETËS SË RE.

T'kam pa duke çelun si boçë trantafili  
kur dielli  
e ngroh n'dashuni,  
dhe shoqet rreth teje kunorë;  
ca lule t'harlisne,  
të bukra, të bardha si borë  
sikur ty të prisnin,  
të thonin: —  
Çel, shoqe,  
lulzo përgjithmonë,  
hieshinë dhe gëzimin  
shpërndaje kudo n' bahçen tonë.

Ti kcenje at' hera  
dhe çelnje ngadalë  
e vallja t' rrëmbente me valë.  
Të qeshte fytyra,  
si qeshet natyra  
në maj.  
mbas shiut, që ka ramun gjithë natën me  
hova  
rrëkajë,

Ti kcenje ndër skena,  
kërcenje ndër sheshe,



ndër festa fshatare,  
n'kantjere përplot me puntorë,  
Pas pune përmbli dhej rinija  
me kazma, lopata në dorë.  
Dhe lodhja harrohej,  
harrohej mundimi  
i punës së sulmit,  
që rritet tek ne.  
Magjepsun nga vallja  
lopata puntorit  
i binte nga dora përdhe.

Sa bukur!  
Flutroneje si flutur,  
rreshqitnje n'për valle si fllad pranveror.  
Dhe shokët e shoqet përçark harmoni,  
me ngjyra, me gaz e gjallni  
hijeshonin rreth teje at' vallen e re,  
at' vallen e jetës, që rritet tek ne!

Sa bukur!  
Ti zbrisnje krenare  
n' kërcimet burrnore,  
n'at' vallën malsore  
ku djemat kërcenjë luftarakë.  
Ti losnje bujare,  
e bukur si zana  
n'mes valles lulzonje  
si tubë trantafilash n'vulla plot zambakë!

At'hera,  
kur vallja zemrohej  
flutroneje përpjeta si zog gjeraqinë,  
Ushtonte podjumi nga krizmat e kambve;

Rrëmbye prej pasjonit,  
pa prishë harmoninë  
flakrojshe n'për valle si rrefta n'për qiell,  
herë butë porsiqëngji,  
herë egër si shqipja  
vringllojshe si shpata në dorë t'luftëtarit,  
rrrotllojshe atë trupin e bukur vërdallë,  
dhe zemërat tona  
n'kantjere, lamije  
trokitnin t'rrëmbyeme  
mbas rritmit të valles përmallë!

## LAVDI NJERIUT

*Me rastin e fluturimit të njeriut të  
parë në kozmos, Juri Gagarinit.*

Sa nanë e mirë, o tokë e lashtë, përhera  
ti qe ne ne! Ndër male e ndër fushore,  
buzë ujnash kristalorë, ti kurrë ushqimin  
nuk ia mungove krijatyrve tua.  
N'për shekuj dora-dora na përcolle,  
e n' gjinin tand, prej kah na jetën morem,  
u kthyem një ditë; pa jetë ti na mbulove.  
Për neve at'hera s'ishte fluturimi.  
Të pa fuqishëm ishim ne spurdhjakë,  
pa krahë e pupla. Çdo kanun i yti  
i shenjtë dhe i egër ish për ne. Kush deshi  
të ngrinte krye, sa randë ti, tokë, e dnove!  
E porsi plakë e prallave të moçme  
misteret thellë i fshehe e vune nome  
e njëmij kushte atij, që do i zbulonte.

\* \* \*

Por ja, që sot krenar, krijesa e tokës,  
njeriu i parë në rruzull ngriti krye  
dhe botës plakë gjithë ligjët e shejtnueme  
nën kambë ia vuni e dyert e qiellit hapi.

Ti, tokë, pushtet nuk pate ma mbi te!  
— Jo vetëm zvarë për ty unë do tërhiqem,  
o nana-tokë, — guxoi e t' tha njeriu.  
— S'më kall në shpirt ma tmerë mue lartësija,  
porsi breznive, që n'për shekuj humben. —  
Dhe tejet u shkëput si qëngj nga grigja.  
U hiku ligjve tua e s'e ndeshkove  
ti dot si t' tjerët. Zot i qiellit trimi  
ndër shtigje t' pa mbarueme depërtoi.  
Ti vetë at'hera mbete e mahnitun  
kur kozmi n' hapsi t' veta e mbështolli  
e një nga një të fshehtat ia tregoi.  
E pau njeriu kufijt ku dita e nata  
ndjekin shoshoqen, pau si ngjyra-ngjyra  
një horizont prrallor mbuloka tokën  
me veshje madhështore, që veç dielli  
din ta qëndisë me rreze dashunore.  
Si zot i feve t' lashta, nalt në qiell  
ai ndej, e ty, o tokë e pafuqishme  
t' soditi sikur s'ishe ti, që e linde  
por ai ty të krijoi me t'luejtun gishti.

Ai ishte njeriu i madh i kohve tona!  
Të tillë si ai atdheu lind i Leninit!  
Në qiell ate Lenini vetë e ngriti.  
Nga mauzoleu dha urdhën, e njeriu  
i parë në kozmosin pa fund flutroi.  
Atë fat s'e patën mbretën, perëndorë,  
që tekjet ma t' çuditshme n' vend i çonin.  
Atyne jo, askurrë nuk iu lejue  
t' andrronin me pushtue hapsitë n' amshim.  
Lavdija s'i takon kurrkujt, por birit  
të pop'llit sovjetik, që arriti kozmin.  
Lavdi sot i këndojmë gjenisë njerzore,

që botën shkundi pluhrit dhe e përtriti  
me shpresa viganore; e i dha t' drejtën  
njeriut t' androrojë paraise, jo tej vorrit  
por n' kozmin tonë, ku ai sot u ba zot.  
Sa afër na ngjan hana! Për te flasim  
me shumë guxim, po thuej me dorë e prekim.  
Vetë Marsi e i bukri hyllë i Afërditës  
sikur po përgatitën të na presin!  
Plot krenari njerzore fluturimin  
e njëmij shqipeve kërkojmë. Sot vrullin  
vigan nuk na e ndalon ma toka as dielli.  
Planetet fqij t' arrijmë; çfarë ata fshehin  
ne t' na i tregojnë. E toka-nanë si qendër  
e gjithë stolive t' jetë, lulishtë e kozmit,  
ku njëmij botë hieshitë e tyne derdhin.  
T' bukra mendime guximtare, shkoni  
ju fluturim ndër njëmij avra t'kozmit,  
e këngën tonë atje kudo përhapni.  
Lavdi t'i kndojë mbarë qielli sot njeriut!

## ZGJOU LAÇ!

Tek ato shpate kodrash së blerueme  
e poshtë nepër fushore deri n' det  
Laçi dremit si gjysh i kohve t' shkueme,  
si plak, që lashtësija e la mbështetë.

E duket hera-herë se po mendohet  
mjekërroç-mustaqe-gjati, thinja-thinja,  
e nepër jerm sikur atij i kujtohet  
se andejpari pat zanë fillë Arbnija.

Janë shekuj shumë, që t' parve u lindi fisi,  
fis, që si lavë nga malet ndër fushore  
u derdh. Katundi shtohet si mizë lisi.  
Sado vorfnisht bukë jepte toka arbnore.

Por luftat fisin tonë e ndiqnin pas  
e kullat me kasolle merrnin flakë.  
Ndër buzë vdekja shtangonte kangë e gaz,  
e gjamë e kob veç sillte në çdo prak.

Frap jeta nuk përkulej, hidhte rranjë  
atje bri knete me mishkonja plot,  
që vdekjes i sherbenin, mort e vajë  
mbillnin në fshat tue herrun mot për mot.

Mbas prite e rrxonte vdekun vllau vëllanë  
për gjak, e ferr'n ia vente mu në derë.  
Prap jeta nuk përkulej; si fidan  
rritej jetimi çamarrok mejherë.

\* \* \*

Mes vorfënisë plot gaz votra fshatare  
e priste udhëtarin mbetun jashtë  
me bukë e krypë e zemer shqipëtare  
një cung nën krye, për shtroje një dorë kashtë.

Në votër zjarri s' prante ndonjëherë.  
e nata mbrunte pjalmin bashkë me borë.  
Veç bishat bridhnin tue kërkue ndoj derë  
vathi për t' hapë e grigjën me e shti n' dorë.

Miku shtegtar ballë zjarrit ndej mbështetë  
brengat e shpirtit hidhte në harresë,  
e humbte në kuvënd me miq t' vërtetë  
që shqiptarisht e ruenin shejtën besë.

Sa egër sillej dimni kur kënetën  
akull pa u ngri kalonin gratë ngarkue  
me duj misri në shpinë tue namë vetveten,  
veç si fëmijë nga urija me i shpëtue.

\* \* \*

E kur pranvera vinte ngjyra-ngjyra  
përtrinte nëpër zemra shpesh gëzim,  
se toka fryte jepte, e ndër fytyra  
vetinte 'i fije gazi pa kuptim.

Kurse mbas gardhi n' terr të zezës natë  
shtrigulja-morde gjuente prenë e vet

dhe brente e brente katundar't e ngratë  
e toka dhe konaqe mbetnin shkret!

\* \* \*

Në votrën plakë, fole supërsticjoni  
ndër nete festash plot me devocjon  
riti ilir zbatonte mbas zakoni  
buzmin bujar me ligjë siç asht zakon.

\* \* \*

Plakoçi-Laç mes kodrash të blerueme  
dremit e koh't e lashta n' mend thërret.  
Zgjou, o katund; me fletët e prarueme  
fati t' arriu në derë e po troket.

Ngreu si t' ka hije, nipat po vrapojnë;  
arritën ingjënjerat tek ti sot,  
e vend për vend po masin e caktojnë  
furrnalta e deri n' qiell oxhaqe plot.

Të lashtën knetë ma nipat s'e mbajnë mend,  
se filladi barin lehtë atje e përkund.  
Atje qyteti i ri do të zajë vend,  
ku fusha e begatë shtrihet pa fund.

Pallate varg e varg sa shumë do ketë!  
Kodrinat veshë me vneshta e me ulli.  
Fruga të drejta e lule deri n' det;  
sirenë e kangë atje do vlojë gjithnji.

Ndër furra djersa ballit do kullojë,  
por djersë, që begatinë ta sjell në prak.



Si monument krenar do të qëndrojë  
qyteti i ri mbi t' moçmin Laçin plak.

Të vegjlit sot, puntorë, teknikë me vlerë  
e mjeshtra n' za do bahen shpejt një ditë.  
Do lulzohet jeta atje si në pranverë  
pemët lulzohet e fusha veshë stolitë!

Zgjiu, o katund, vesh robën, që t' përket,  
shpërthe pors zambaku kur harbon;  
mbrueju ngadalë me t' bukurin qytet  
e merr rininë, atdheu po ta dhuron!

## TRYEZA E LËNDËS

### QIRIU I FUNDIT

Pjesa e parë . . . . .	3
Pjesa e dytë . . . . .	9
Pjesa e tretë . . . . .	14
Pjesa e katërtë . . . . .	19
Pjesa e pestë . . . . .	23
Pjesa e gjashtë . . . . .	31
Pjesa e shtatë . . . . .	37
Pjesa e tetë . . . . .	42

### DISA VJERSHA

Parti krenarë . . . . .	51
Amanet . . . . .	54
Valltarja e jetës së re . . . . .	57
Lavdi njeriut . . . . .	59
Zgjou Lac . . . . .	62

Redaktor: Halil Baniçani  
Pikturues: Ismail Olliani  
Redaktor teknik: Adnan Lila

Shënim: Kjo libërçka është e shpërndarë në të gjitha bibliotekat dhe shtëpitë botuese të shtetit dhe të bashkësisë.

Redaktor: Razi Brahimi

Piktore: Dolli Gjinali

Redaktor teknik: Adem Lita

Tirazhi 1500 kopje      Formati 78x109/32      Stash: 2204-55

Shtyp. N.I.Sh. Shtypshkronjave «MIHAL DURI» — Tiranë